

Headline	Pengajian tinggi terus diperkasa	Language	MALAY
Date	30. Aug 2008	Page No	15
Media Title	Berita Harian	Article Size	290 cm2
Section	Nasional	Frequency	Daily
Circulation	217920	Color	Full Color
Readership	2083000	AdValue	5135.53



Pengajian tinggi terus diperkasa

Tambah peruntukan tingkat mutu pendidikan

Bajet 2009

Oleh Syuhada Choo Abdullah
choo@bharian.com.my

KUALA LUMPUR: Peningkatan peruntukan kepada Kementerian Pengajian Tinggi dalam Bajet 2009 mencerminkan komitmen kerajaan untuk mencapai transformasi dalam bidang pengajian tinggi negara seperti yang disasarkan.

Menterinya, Datuk Seri Mohamed Khaled Nordin, berkata kementerian mengalukan keprihatinan Perdana Menteri, Datuk Seri Abdullah Ahmad Badawi yang mengumumkan peruntukan RM14.1 bilion dalam bajet kali ini, meningkat berbanding RM12 bilion Bajet 2008.

"Ini bajet yang mengandungi 'bingkisan' untuk semua peringkat rakyat. Kita mengalukan keprihatinan Perdana Menteri terhadap kementerian, lebih-lebih lagi untuk memastikan kejayaan Pelan Strategik Pengajian Tinggi Negara," katanya.

Sementara itu, Naib Canselor Universiti Kebangsaan Malaysia, Prof Datuk Dr Sharifah Hapsah Syed Hasan Shahabudin, berkata keprihatinan kerajaan terbukti konsisten dalam bajet kali ini untuk memastikan kualiti pengajian tinggi terus diperkasa.

"Kerajaan tidak mengabaikan perhatian serius kepada perkembangan bidang pengajian tinggi dan pada masa sama turut memberi keutamaan terhadap kesejahteraan rakyat, ini adalah satu penekanan yang betul," katanya.

Meskipun tiada pengumuman universiti bagi program apex, Sharifah Hapsah berkata, UKM sebagai antara empat universiti penyelidikan yang disenarai pendek akan terus komited melaksanakan pelan transformasi ke arah kece-merlangan bertaraf dunia.

"Sama ada terpilih atau tidak (apex), semua universiti terbabit wajar mengusahakan yang terbaik untuk mencapai kecemerlangan pada peringkat antarabangsa," katanya.

Naib Canselor Universiti Putra Malaysia (UPM), Prof Datuk Dr Nik Mustapha R Abdullah berkata, peningkatan peruntukan RM2.1 juta untuk institusi pengajian tinggi adalah angka munasabah untuk melonjakkan kecemerlangan dan memberi perhatian wajar terhadap penghasilan graduan berkualiti.



CEMERLANG: Kerajaan berusaha memastikan graduan dari universiti tempatan berkualiti dan berdaya saing.